

## Headlines

1. गृहमंत्री अमित शाह होरं अज्जै थमां जम्मू-कश्मीर दे दौरे पर आवा'रदे न। ओह उच्च स्तह दी सुरक्षा जायजा बैठक लागन ते केई विकास कम्में दी श्रीनगर च शुरुआत करगन।
2. मुख्मन्त्री उमर अब्दुल्ला हो'रें आखेया जे कैसर दे मरीजें गी हर बेहतर सूहलत उपलब्ध करोआने लेई सरकार वचनबद्ध ऐ। मुख्मन्त्री होरें जी.एम.सी. जम्मू च विश्व कैसर दिवस कार्यक्रम गी सम्बोधत कीता।
3. उप-मुख्मन्त्री सुरेन्द्र चौधरी हो'रें आखेया जे एन.सी.सी. युवाएं च बहादुरी- अनुशासन ते एकता दी भावना पैदा करदी ऐ।
4. जम्मू च आयोजित Batt कोच कार्यक्रम च मंत्री सतीश शर्मा होरें सिनेमा दी कश्मीरी संस्कृति गी बढ़ावा देने ते ओदे संरक्षण प्रति भूमिका गी उजागर कीता।
5. मौसम विभाग नै 8 फरवरी तगर मौसम आमतौर पर खुश्क रौहने दी पेशगोई कीती 9 ते 10 फरवरी गी हलकी बराखा ते बर्फबारी होई सकदी ऐ।

<><><><><><>

## HM -JK Visit

केंद्री गृह मंत्री अमित शाह होर अज्जै थ्वा त्रै दिन दे जम्मू-कश्मीर दे दौरे पर आवा'रदे न। उन्दे दौरे दे मद्देनजर बादू सुरक्षाबलें दी तैनाती कीती गेई ऐ ते संवेदनशील इलाके च निगरानी बदाई दिती गेई ऐ। अधिकारिणं दा आखना ऐ जे खित्ते च कनून बवस्था बनाई रखने लेई सारे लोड़चदे इंतजाम कीते गेदे न। आकाशवाणी जम्मू संवाददाता दी रिपोर्ट मूजब गृह मंत्री होर इस दरान सुरक्षा स्थिति दा जायजा लैडन। सियासी नेताएं कन्नै बैठक करडन ते केई सारी विकास परियोजनाएं दी शुरुआत करडन। शाह होर संजा 5 बजे जम्मू पुज्जडन ते फीहू लोकभवन च सियासी नेताएं कन्नै मलाटी करडन।

<><><><><><>

## CM -Cancer Day

मुख्यमंत्री उमर अब्दुल्ला होरें कैंसर दे मरीजें सरबन्धी पेशेवर लोकें लेई बेहतर संभव सहूलतां उपलब्ध करोआने प्रति सरकार दी वचनबद्धता गी फही पक्का कीता। एह गल्ल मुख्य मंत्री होरें विश्व कैंसर दिवस दे मौके जी.एम.सी जम्मू च आयोजित इक कार्यक्रम गी सम्बोधित करदे होई आखी। जी.एम.सी. जम्मू च जे.एंड.के कैंसर Fights विशे पर कार्यक्रम आयोजित कीता गया। अपने सम्बोधन च मुख्यमंत्री होरें सेहत सरबन्धी दिक्खभाल आहले सरिस्ते गी मजबूत करने ते म्यारी दिक्खभाल सब्भनें लेई उपलब्ध करोआने पर जोर पाया। उनें मेद जाहिर कीती ऐ जे विश्व कैंसर दिवस उसलै सेई मायने च मनाया जाग- जिसलै कैंसर पूरी चाली खत्म होई जाग।

<><><><><><>

## CM -SMGC Block

मुख्यमंत्री उमर अब्दुल्ला होरें कल एस.एम.जी.एस. अस्पताल जम्मू समर्थ आहले जच्चा-बच्चा ब्लाक दा उदघाटन कीता। इस नमें ब्लाक दे निर्माण पर 31 करोड़ 59 लख रपे दी लागत आई ऐ। अपनी किस्मा दा एह पैहला ब्लाक क्रिटिकल केयर आहली सेवा ते ओ.टी. कॉम्पलैक्स कन्नै लैस ऐ। इसदे कन्नै बेहतर सेहत सुविधा हासिल होगन। इस मौके पर सेहत मंत्री स्कीना इत्तू-मुख्यमंत्री हुंदे सलाकार नासिर असल वानी ते जम्मू पूर्व थमां विधायक युद्धवीर सेठी होर बी मौजूद हे।

<><><><><><>

## LA Proceedings

मुख्यमंत्री उमर अब्दुल्ला होरें 2025-26 दे आर्थिक सर्वेक्षण रिपोर्ट दी प्रति विधान सदन दे अटल पर रक्खगन। ओह जम्मू-कश्मीर आनंद ब्याह पंजीकरण नियम 2023 दी इक प्रति बी पटल पर रक्खगन। इसदे इलावा उपराज्यपाल हुंदे अभिभाषण पर धन्नवाद प्रस्ताव पर चर्चा अज्ज बी जारी रौहग। मुख्यमंत्री होर अज्ज धन्नवाद प्रस्ताव पर परता देगन।

<><><><><><>

## Dy. CM –NCC

उपमुख्यमंत्री सुरेन्द्र चौधरी होरें गणतंत्र दिवस शिवर 2026 च हिस्सा लैने आहलें ते बेहतरिन कारकरदगी दस्सने आहलें जम्मू-कश्मीर ते लद्दाख निदेशालय दे एन.सी.सी. कैडेटें कन्नै कल मलाटी कीती। कन्वेंशन सेंटर जम्मू च उपमुख्यमंत्री होरें उन्दे अनुशासन- आत्मविश्वास ते निष्ठा दी सराहना कीती ते आखेया जे उंदी इस गल्ला लेई राष्ट्रीय स्तह पर सराहना होआ'रदी ऐ।

चौधरी होरें कैडेटें गी आखेया जे ओह सेई मायनें च जम्मू-कश्मीर दे दूत न। जम्मू ते कश्मीर ते लद्दाख निदेशालय दी सराहना करदे होई उपमुख्यमंत्री होरें आखेया जे एन.सी.सी. दे कार्यक्रम च हिस्सा लैने कन्नै युवाएं च एकता- बहादुरी ते अनुशासन आहली भावना गी बल थोंदा ऐ।

<><><><><><>

## Satish Cinema

मंत्री सतीश शर्मा होरें कल इंदिरा थेटर जम्मू आले मूवी टाईम सिनेमा च आयोजित Batt कोच फिल्म आले इक वशेश सिनेमाई कार्यक्रम दरान मकामी फिल्म निर्माताएं ते सांस्कृति कन्नै जुड़े दे लोकें दे जतनें दी सराहना कीती ते आखेया जे इनें लोकें सिनेमा दे राहें कश्मीरी भाषा ते परम्पराएं गी बढावा देने च टकोहदा योगदान दिता ऐ। आकाशवाणी दे जम्मू संवाददाता दी रिपोर्ट मुजब इस मौके किट्टै गी सम्बोधित करदे होई मंत्री होरें आखेया जे क्षेत्रिय सिनेमा सांस्कृति पंछान गी बचाने ते जम्मू-कश्मीर दी समृद्ध विरासत दे संरक्षण लेई महत्वै आहली भूमिका निभांदा ऐ। उनें जोर देइयै आखेया जे Batt कोच जनेह जत्त इक महत्वै आहला मंच उपलब्ध करोआंदे न- तां जे खित्ते दे इतिहास- ज़ज्बात ते समाजी ताने-बाने गी खरी चाली दस्सी सकन।

<><><><><><>

## JK Encounter

सुरक्षाबलें किश्तवाड़ जिले च इक टाकरे दौरान इक आतंकवादी दा सफाया करी दिता ऐ। व्हाइट नाइट कोर नै सोशल मीडिया दी इक पोस्ट “एक्स” पर दस्सेया जे आप्रेशन Trashi-I आतंकवादियें दे खात्में लेई चलाया जा’रदा ऐ ते इक आतंकवादी मारेया गया ऐ। साहूडे संवाददाता नै जानकारी दिती ऐ जे सुरक्षाबलें दी सांझी टीम आस्सेया किश्तवाड़ जिले दे छात्रु इलाके च इक सांझी कारवाई कीती गई। सुरक्षाबलें इलाके दी घेराबंदी करियै तपाशी अभियान चलाया- जेदे मगरा एह टाकरा भखी पेया। इस्सै टाकरे च इक आतंकवादी मारेया गया।

<><><><><><>

## DC Jammu

जम्मू दे डिप्टी कमीशनर डाक्टर राकेश मिन्हास होरे सुचेतगढ़ ब्लाक दे Upper Chakroi थाहर ब्लाक दिवस कार्यक्रम च हिस्सा लैता। इस दौरान उनें लोकें दियें समस्याएं गी सुनेया ते सरबन्धी मैहकमें गी उन्दे हल आस्तै निर्देश दिते। किट्टै गी सम्बोधित करदे होई डिप्टी कमीशनर होरें भरोसा दोआया जे सिंचाई लेई पानी खीरले खेतर तगर पुज्जोग। इस मौकें नैहरें च पानी दे लोड़चदे बहाव गी बनाई रक्खने ते कमियें-पेशियें गी दूर करने लेई व्यापक योजना बी बनाई गई ऐ। उनें लोकें गी आग्रह कीता जे ओह गंदगी ते गंदे पानी गी पानी दे स्रोतें च नैई पान।

<><><><><><>

## Weather

मौसम विभाग नै जम्मू-कश्मीर च अगले इक हफ्ते तोड़ी मौसम आमतौर पर खुश्क रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। आकाशवाणी संवाददाता नै मौसम विभाग दे हवालै नै जानकारी दिती ऐ जे अज्जै थ्वा गास आमतौर पर साफ रौहने दी मेद ऐ। पर 6 फरवरी गी रातीं लै उच्चियें धारें पर किश थाहरें हलकी बर्फबारी होई सकदी ऐ। 7 ते 8 फरवरी गी मौसम आमतौर पर साफ रौहग उआं 9 ते 10 फरवरी गी किश थाहरें पर हलकी बरखा ते बर्फबारी होई सकदी ऐ। 11 ते 12 फरवरी थमां मौसम फही आमतौर पर खुश्क गै रौहग।

<><><><><><>